

ଯୋହନଙ୍କ ଲିଖିତ ପ୍ରଥମ ପତ୍ର ଜୋହନ ରାସ୍ତାମାନି ପାରୁତୁମ୍ ଆକୁ ଇୟା ଆକୁଦି ମାନି ଏସ ମାଟା

ଜୋହନଦି ପାରୁତୁମ୍ ଆକୁ : ଜିସୁ କ୍ରିସ୍ତଦି ଜନମ୍ ଖେନେକା ୫୦ ଦାନ୍ ୧୦୦ ବାର୍ଷେକ୍ଦି ଲୋଇ ପ୍ରେରିତ ଜୋହନଦି ମାଣାନ୍ ରାସାତାମାନାତ୍ ଜୋହନ ନିଜେଦିଙ୍ଗ୍ ରାସ୍ତି ଇସାପ୍ତାନ ପରିଚୟ ସିଏନ୍, ମାତର ପ୍ରାର୍ଥୁମ୍ ଅଧ୍ୟାୟତୁ ଖାନ୍ କ୍ରିସ୍ତଦି ଜିବନ୍ତି ମାରି ନିଙ୍ଗ୍ ନି ମାଣାନ୍ ଖାନ୍ ରାକ୍ଷୁଷ ସାକି ମାନାନ୍ ଇଜି ନେସ୍ତେଙ୍ଗ୍ ଆବ୍ଦିକା ୧:୧-୩ । ୧ ଜୋହନ ରାସାତି ଗୁଣ୍ ଜୋହନ ରାସ୍ତି ଆକୁଦି ସୁସମାଚାର ଗୁଣ୍ଡି ରାସ୍ତି ବିସୟ ଝିକୁ ବେସି ଡାଗୁରୁ ତୋରିଜିନାତ୍ । ତେନିଙ୍ଗ୍ ବିସ୍ବାସ୍ କିନାର୍ ଜେ ଏସ୍ତିଖାଲେ ଖାନ୍ ଏପିସିଦୁ ମାରାନ୍ ଖାନ୍ ଜୋହନ ରାସ୍ତି ସୁସମାଚାର ମାରି ଜୋହନତି ମୁଣ୍ଡି ପୁସ୍ତକ ରାସାତ୍ ମାରାନ୍ ମାରି ୧ ଜୋହନ, ୨ ଜୋହନ, ୩ ଜୋହନ ।

ବୁଦ୍ଧି ଇନ୍ଦ୍ରିୟମାନି ଏସଲୋକା ମାଡାନ୍ ମଣ୍ଡୁଲିଦି ସମସ୍ୟା ସାମନାଆଜିମାରି ବେଡାଦୁ ଜୋହନ ଝିକୁ କ୍ରିସ୍ତୟାନ୍ ଲୋକାଙ୍ଗ୍ ଇୟା ଆକୁ ରାସ୍ତାମାନାନ୍ । ଖାର ବିସ୍ବାସ୍ କିନାର୍ ଯେ ଜିସୁ ସତ୍ତାନ୍ ସତ୍ ମାପୁରୁ ନେ ମାତର ଦେସ୍ତୁ ମାରି ବେଡାଦୁ ଖାନ୍ ନେତେର୍ ମେନ୍ଦଲ୍ ଆସ୍ତି ଲୋକୁ ଆଏନ୍ । ଜୋହନ ଜିସୁ କ୍ରିସ୍ତଦି ସାକିଦାନ୍ ସାକି ମାରି ଖାନି କିୟୁ ଜିସୁଙ୍ଗ୍ ମୁଟ୍ତି ମାରିଙ୍ଗ୍ ଖାନ୍ ଇକା ରାସ୍ତାନ୍ ୧:୧-୩ ଜୋହନ ଇୟା ଆକୁ ରାସ୍ତି ବିସୟ ଆଜିନାତ୍ ଖାନ୍ ଝେଡିକା କିନିକା ୧ ଜୋହନ ୪:୧ ମାରି ବିସ୍ବାସ୍ରିଙ୍ଗ୍ ପାପ୍ତାନ୍ ଆକ ଇଡ୍ଦେଙ୍ଗ୍ ୧ ଜୋହନ ୨:୧ ମାରି ମିଟ୍ ସାକ୍ୟଦାନ୍ ବିସ୍ବାସ୍ରିଙ୍ଗ୍ ରକ୍ତୟା କିଦେଙ୍ଗ୍ ୧ ଜୋହନ ୨:୨୬ ମାରି ବିସ୍ବାସ୍ରିଙ୍ଗ୍ ରକ୍ତୟା କିଜି ଡିକ୍ କିଦେଙ୍ଗ୍ ୫:୧୩ ।

ଇୟା ଆକୁଦୁ ମାନି ମୁକିୟ ବିସୟ

୧ ଜୋହନ ଖାନି ଆକୁଦି ବିସୟତିଖାଲେ ରାସାତି ଉଦେସ୍ ରାସ୍ନାନ୍ । ୧:୧-୪

୨. ମାପୁରୁ ଏଣ୍ଡେସ୍ ଜାୟ ଆନାନ୍ ବୁଜାକିଜି ଜିସୁଦି ଖାଜା ଜିଦେଙ୍ଗ୍
ଇନାନ୍ । ୧:୫-୩:୧୦
୩. ମାପୁରୁଙ୍ଗ୍ ଜିବନ୍ନୋନି ବିସୟତାନ୍ ମାଙ୍ଗ୍ ମନ୍ତୁ ଅଡ୍‌ବିସ୍‌ନା
ସିନାନ୍ । ୩:୧୧-୫:୧୨
୪. ଖାନ୍ ଖାନି ରାସ୍‌ନିକା ଓସ୍‌ନାନ୍ । ୫:୧୩-୨୧

ଜିବନ୍ତି ବାକ୍ୟ

୧ ☆ ପୁର୍ବେକାଡ଼ାଦାନ୍ ଏନ୍ ମାର୍ହାନ୍, ଆୟା ଜିବନ୍‌ସିନି ବାକ୍ୟ
ବିସୟତାନ୍ ମାପୁ ରାସ୍‌ତେଙ୍ଗ୍ ସୋଲ୍‌ସିନାପ୍ । ଖାନି ବାକ୍ୟ ମାତୁ
ଝେରଇମାନିକା, ନିଜେଦି କାଣ୍‌କାଣୁକୁ ସୁଡ଼ତୁମାନାପ୍, ଆମାଖାନିଙ୍ଗ୍
ସୁଡ଼ତୁମାନାପ୍ ମାରି ନିଜେଦିକିୟୁଦାନ୍ ମୁଡ଼ତାମାନାପ୍ ।

୨ ☆ ଜିବନ୍‌ମାନି ଆୟା ବାକ୍ୟ ଏସ୍ତିଖାଲେ ତରାଇଆତାଡ୍, ମାପୁ
ଖାନିଙ୍ଗ୍ ସୁଡ଼ତୁମାନାପ୍ ଆଦେଙ୍ଗ୍ ଖାନି ବିସୟତାନ୍ ଇୟା ମାଟା
ସାକ୍ୟ, ଏସାଙ୍ଗ୍ ଓଜ୍‌ଇ ମାଟା ଝେରତାମାନାପ୍; ଯେ ଏସ୍‌କାଙ୍ଗ୍‌ଓଜ୍‌ଇ
ଜିବନ୍ ଖାଜା ଖାନ୍ ବୁବା ଖାଲେ ଓଜ୍‌ଜୁଦିନ୍ ମାର୍ହାନ୍ ମାରି ଖାନ୍
ମା ଲାକ୍ତୁ ତରିତାମାନାନ୍, ଖାନି ବିସୟତାନ୍ ମାପୁ ଇୟା ମାଟା
ଝେରସିନାପ୍ ।

୩ ଆମାକା ମାପୁ ସୁଡ଼ତୁମାନାପ୍ ମାରି ଝେରିମାନିକା, କେବଲ୍
ଆୟା ମାଟା ମି ଲାକ୍ତୁ ଝେରସିଇଜିନାପ୍, ଇକା ଝେନ୍‌ଜି ବୁବା ମାପୁରୁ
ମାରି ଖାନି ମାରିସି ଜିସୁ କ୍ରିସ୍ତଦି ଖାଲେ ମା ଆମା ସହବାରିତା ମାନାଡ୍,
ଆବେନ୍ନୁ ମିରୁ ମିସାନିଦେର୍,

୪ ମାରି ମା ଝେଡ଼ିକା ଏଣ୍ଡେସ୍ ପୁରାବତ୍ ଆନାଡ୍, ଆୟାଉଣ୍ଡିଙ୍ଗ୍
ମାପୁ ଇୟାଓଜ୍‌ଜୁ ରାସ୍‌ସିନାପ୍ ।

ମାପୁରୁ ଜାୟ

୫ ମାପୁରୁଦି ମାରିନ୍ ଜିସୁଦିମାନ୍ ଆମା କାବୁର୍ ଝେନ୍‌ଜି
ଝେରସିନାପ୍ ମାରି ମିଙ୍ଗ୍ ଝେରସିନାପ୍, ଆକା ଆଜିନାଡ୍ : ମାପୁରୁଦି
ଜାୟ, ମାରି ଖାନିମାନ୍ ଇସ୍ତିକା ଟିକାବା ସିକାଟି ସିଲେଡ୍ ।

୬ ଖାନ୍ତି ଖାଲେ ମା ସହବାଗିତା ମାନାଡ଼, ଇକା ଇନ୍‌ଜି ଜଦି ମାଡୁ ସିକାଟିଦି ମାନିକା, ଆର୍ଡିଙ୍ଗ୍ ମାଟାଡୁ ମାରି ପାଣିଡୁ ମାଡୁ ମିଟ୍‌ଆନିକା । ମାରି ସଡ଼ ବ୍ୟବହାର୍ କିଏପ୍ ମାନାପ୍ ।

୭ ମାତର୍ ମାପୁରୁଦି ଖାଜା ମାଡୁ ଜଦି ଜାୟୁ ବାସାନିକାନ୍, ମାଡୁ ଆୟାଖାଜା ଜାୟୁ ବାସାନିକା, ଆର୍ଡିଙ୍ଗ୍ ମା ନିଜେନିଜେଦିଙ୍ଗ୍ ସହବାଗିତା ମାନାଡ଼, ମାରି ଖାନ୍ତି ମାରିସି ଜିସୁଦି ନେତେର୍ ଖିଜୁ ପାପ୍‌ତାନ୍ ନରିସ୍ କିନାଡ଼ ।

୮ ମାଡୁ ଜଦି ପାପ୍ ସିଲେଡ଼, ଇଜି ଇନିକା, ଆର୍ଡିଙ୍ଗ୍ ନିଜେନିଜେଦିଙ୍ଗ୍ ଟକେ କିନିକା, ମାରି ମାମାନୁ ଅଡ଼ପ୍‌ବା ସଡ଼ ସିଲେଡ଼ ।

୯ ମାତର୍ ମାପୁରୁଦି ଲାକ୍‌ଡୁ ଜଦି ନିଜେଦି ପାପ୍ ମାନାନିକା, ଖାନ୍ତି ପାର୍‌ମାଣ୍ଡି ଇସାବ୍‌ତାନ୍ ମା ଉଣ୍ଡିଙ୍ଗ୍ ନ୍ୟାୟତି ବ୍ୟବହାର୍ କିନାନ୍, ଖାନ୍ ମା ପାପ୍ କେମା କିଜି ଖିଜୁ ଅଦାର୍‌ମୁଦାନ୍ ମାଙ୍ଗ୍ ନରିସ୍ କିଦେଙ୍ଗ୍ ବିସ୍‌ବାସ୍ ନି ନ୍ୟାୟତିକାନ୍ ।

୧୦ ମାପୁ ପାପ୍ କିଏପ୍, ଇକା ଜଦି ଇନିକା, ଆର୍ଡିଙ୍ଗ୍ ମାଡୁ ମାପୁରୁଙ୍ଗ୍ ମିଟ୍‌ଖେରନିକାନ୍, ମାରି ଖାନ୍ତି ବାକ୍ୟ ମା ମୋନ୍‌ଡୁ ସିଲେଡ଼ ।

୨

ରକିୟାକିନି ଜିସୁ

୧ ଏ ନା କଡ଼ର୍, ମିଙ୍ଗ୍ ନାନୁ ଇୟା ସିଟି ରାସ୍‌ନି ବିଷୟ, ଇକା ପଡ଼ାଜି ଏଣ୍ଡେସ୍‌ମାରି ପାପ୍ କିଇଦେର୍ । ମାରି ମିଟ୍ ଏଣ୍ଡେସ୍ ନେସ୍‌ନିଦେର୍, ଏନ୍ ଜଦି ପାପ୍ କିନାନ୍, ମା ଉଣ୍ଡିଙ୍ଗ୍ ବୁବା ମାପୁରୁଦି ଲାକ୍‌ଡୁ ମା ଅରେନ୍ ପେରି ଲୋକ୍ ମାନାନ୍ ଆୟା ଦାର୍‌ମୁଦି ଜିସୁ କ୍ରିସ୍ତ ।

୨ ମାରି ଆୟା କ୍ରିସ୍ତ ନିଜେ ମା ପାପ୍ ଉଣ୍ଡିଙ୍ଗ୍, କେବଲ୍ ମା ପାପ୍ ଉଣ୍ଡିଙ୍ଗ୍ ସିଲେ, ମାତର୍ ସାରାଦୁନିଆଦି ପାପ୍ ଉଣ୍ଡିଙ୍ଗ୍ ବା ଜିବନ୍ ସିତାମାନାନ୍ ।

୩ ଜଦି ମାପୁ ଖାନ୍ତି ମାଟା ମାନାନାପ୍, ଆର୍ଡିଙ୍ଗ୍ ଆୟାମାଣୁକୁ ନେସ୍‌ତେଙ୍ଗ୍ ଆଟ୍‌ନାପ୍ ଜେ, ମାପୁ ଖାନ୍ତିଙ୍ଗ୍ ନେସ୍‌ନାପ୍ ।

୪ ଝାନି ମାଟା ମାନାଏଶଗା ଝାନିଙ୍ଗ ନେସ୍ତାମାନା ଇଜି ଏନ୍ ଇନ୍ନାନନ୍, ଝାନ୍ ଅରେନ୍ ମିତ୍ତେନ୍ନିକାନ୍ ମାରି ଝାନିମାନ୍ ସତ୍ ସିଲେଡ୍ ।

୫ ମାତର୍ ଏନ୍ ଝାନି ବାକ୍ୟ ମାନାନନ୍, ଝାନିମାନ୍ ମାପୁରୁଦି ଜିବନ୍ନୋନିକା ସତ୍ତାନ୍ ପୁରା ଆତାମାନାଡ୍ । ଆୟାମାଣୁକୁ ମାପୁ ନେସ୍ତାପ୍ ଜେ, ମାପୁ ଝାନିମାନ୍ ମାନାପ୍ ।

୬ ଏନ୍ ମାପୁରୁଦି ମାନ୍ ମାନା ଇଜି ଇନାନ୍, ଝାନ୍ କ୍ରିସ୍ତ ଜିସୁଦି ଝାଜା ଜିବନ୍ ଯାପନ କିନିକା ମାନାଡ୍ ।

ପୁନି ମାଟା

୭ ☆ଏ ନା ତଡ୍କୁ, ନାନ୍ ମି ଲାକ୍ତୁ ଆମା ପୁନି ମାଟା ରାସ୍ଏ, ମାତର୍ ଆଗ୍ଡିରାନ୍ ଆମା ପାଡିଇ ମାଟା ମିର୍ ନେସ୍ତିମାନିଦେର୍, ଆକା ରାସ୍ସିନା; ମାପୁ ପ୍ରଚାର କିଜିମାନି କାବୁରୁଡ୍ ଆୟା ମାଟା ଝେର୍ଇମାନିଦେର୍ ।

୮ ମାତର୍, ନାନ୍ ପୁନି ମାଟା ମି ଲାକ୍ତୁ ରାସ୍ସିନା, ଇକା କ୍ରିସ୍ତିମାନ୍ ନି ମିମାନ୍ ସତ୍ ଇଜି ଝେଙ୍ଗେନାଡ୍ । ଇରିଙ୍ଗ୍ ସିକାଟି ଗୁସାଜିସୋଲ୍ସିନାଡ୍ ମାରି ସତ୍ତି ଜାୟ୍ ଇଲେ ତରିତାଡ୍ନି ।

୯ ଜଦି ଏନ୍ ନିଜେଦି ତଡ୍ନାଡିଙ୍ଗ୍ କାଡ୍ନାଜି ଇନାନ୍ ଜେ, ଝାନ୍ ଜାୟ୍ତୁ ମାନାନ୍, ଝାନ୍ ଇୟାସାନ୍ସିବା ସିକାଟିଦୁ ମାନାନ୍ ।

୧୦ ଏନ୍ ନିଜେଦି ତଡ୍ନାଡିଙ୍ଗ୍ ଜିବନ୍ନୋନାନ୍, ଝାନ୍ ଜାୟ୍ତୁ ତେବାନାନ୍, ମାରି ଝାନିମାନ୍ ତାକାନି ଇନି ପାଣି ସିଲେଡ୍ ।

୧୧ ମାତର୍ ଏନ୍ ନିଜେଦି ତଡ୍ନାଡିଙ୍ଗ୍ କାଡ୍ନାନ୍, ଝାନ୍ ସିକାଟିଦୁ ମାନାନ୍, ମାରି ସିକାଟିଦୁ ବୁଲାଇ ଆମା ତରିନ୍ ସୋଲ୍ସିନାନ୍, ଆକା ନେସ୍ଏନ୍, ଇରିଙ୍ଗ୍ ସିକାଟି ଝାନି କାଣା କିତାମାନାଡ୍ ।

୧୨ ଏ କଡ୍ଡର୍, ନାନ୍ ମି ଲାକ୍ତୁ ରାସ୍ସିନା, ଇରିଙ୍ଗ୍ କ୍ରିସ୍ତିଦି ଦର୍ତି ଉଣ୍ଡିଙ୍ଗ୍ ମି ପାପ୍ କେମା ଆତାମାନାଡ୍ ।

୧୩ ଏ ବୁବାର୍, ନାନ୍ ମି ଲାକ୍ତୁ ରାସ୍ସିନା, ଇରିଙ୍ଗ୍ ଏନ୍ ପୁର୍ବେକାଡ୍ବାଦାନ୍ ମାନାର୍, ଝାନିଙ୍ଗ୍ ମିରୁ ନେସ୍ତିମାନିଦେର୍ । ଏ ମୁରକଡ୍ଡର୍, ନାନ୍ ମି ଲାକ୍ତୁ ବା ରାସ୍ସିନା, ଇରିଙ୍ଗ୍ ମିରୁ ପାପ୍ ଆମ୍ବାଦିଙ୍ଗ୍ ଜିଣାତି ମାନିଦେର୍ ।

୧୪ ଏ କଡ଼ର, ନାନୁ ମି ଲାକ୍ତୁ ରାସସିନା, ଇରିଙ୍ଗ ମିରୁ ବୁବେଙ୍ଗ ନେସ୍ତିମାନିଦେର୍ । ଏ ବୁବାରୁ, ନାନୁ ମି ଲାକ୍ତୁ ରାସସିନା, ଇରିଙ୍ଗ ଏନ୍ ପୁର୍ବେକାଡ଼ାଦାନ୍ ମାନାନ୍, ମିରୁ ଖାନିଙ୍ଗ ନେସ୍ତିମାନିଦେର୍ । ଏ ମୁର୍କଡ଼ର୍, ନାନୁ ମି ଲାକ୍ତୁ ବା ରାସସିନା, ଇରିଙ୍ଗ ମିରୁ ସାକ୍ତିମାନିଦେର୍, ମାରି ମାପୁରୁଦି ବାକ୍ୟ ମିମାନୁ ମାନାଡ଼ ମାରି ମିରୁ ପାପ୍ତିଙ୍ଗ ଜିଣାତି ମାନିଦେର୍ ।

ଦୁନିଆଦିଙ୍ଗ ଜିବନ୍‌ନୋମାଟ୍

୧୫ ଇୟା ଦୁନିଆ ମାରି ଆବେନ୍ନୁ ମାନି ବିସୟ୍‌ତିଙ୍ଗ ଝିଜୁ ଜିବନ୍‌ନୋମାଟ୍, ଜଦି ମିରୁ ଜଗଡ଼ତିଙ୍ଗ ଜିବନ୍‌ନୋନିଦେର୍, ବୁବାଦି ଉଣ୍ଡିଙ୍ଗ ଜିବନ୍‌ନୋନିକା ମିଙ୍ଗ୍ ସିଲେଡ଼ ।

୧୬ ଇୟା ଜଗଡ଼ତି ଆମାଝିଜୁ ମୋନ୍‌ଲ ବିସୟ୍ ଝେଡ଼ିକା କିଦେଙ୍ଗ ଲୋକୁ ଆସାଆନାର୍, ଲୋକୁ ଆମାଝିଜୁ ସୁନ୍‌ରତି ବିସୟ୍ ସୁଡ଼ୁ ଆସାୟ୍ ଆନାର୍ ମାରି ଆମା ଝିଜୁ ଦୁନିଆଦି ବିସୟ୍ ଅସି ଲୋକୁ ଗର୍ବ କିନାର୍, ଆକା ଝିଜୁ ବିସୟ୍ ବୁବାଦିମାଣୁକୁ ସିଲେ, ମାତର୍ ଦୁନିଆଦାନ୍ ଖାତା ମାନାଡ଼ ।

୧୭ ଲୋକୁ ଜଗଡ଼ ମାରି ଖାନି ଆମା ଝିଜୁ ବିସୟ୍ ପାଣି କିନାନ୍, ଖାନ୍ ସାନିକା ଗଟାନାଡ଼, ମାତର୍ ଏନ୍ ମାପୁରୁଦି ବଦା ମାନାନାନ୍, ଖାନ୍ ଝିଜୁଦିନ୍‌ତିକାନ୍ ।

କ୍ରିସ୍ତଦି ସାତୁ

୧୮ ଏ କଡ଼ର, ସାରାସାରି ଦିନ୍ ଇଗା ଖାତାଡ଼ନି, କ୍ରିସ୍ତଦି ସାତୁ ଖାନାନ୍ ଇଜି ମିରୁ ଝେର୍‌ଇମାନିଦେର୍, ଆୟାଞ୍ଜା କ୍ରିସ୍ତଦି ଗାଦିଲୋକ୍ ସାତୁରୁ ଇଲେଇ ତରିତାର୍‌ନି; ଇୟାଉଣ୍ଡିଙ୍ଗ ମାପୁ ନେସ୍‌ସିନାପ୍ ଜେ, ସାରାସାରି ଦିନ୍ ଇଗା ଖାତାଡ଼ନି ।

୧୯ ଇୟାକାର୍ ସଡ଼ତାନ୍ ମା ଦଲ୍‌ତି ଲୋକୁ ଆଏର୍, ଆୟାଉଣ୍ଡିଙ୍ଗ ଖାର୍ ମା ଲୋଇରାନ୍ ସତାସର୍‌ହାର୍, ମା ଲୋକୁ ଆତିମାରିଙ୍ଗ୍, ଆରତିଙ୍ଗ ଖାର୍ ମା ଖାଲେ ତେବାତାର୍ ମାନ୍‌ସି, ମାତର୍ ଖାର୍ ମା ଦଲ୍‌ତିକାର୍ ଆଏର୍ ଇଜି ଇକା ଏଣ୍ଡେସ୍ ଝେଙ୍ଗ୍‌ନାଡ଼, ଇୟାଉଣ୍ଡିଙ୍ଗ ଖାର୍ ଆକ ସର୍‌ହାର୍ ।

୨୦ ମାତର ମିରୁ କ୍ରିସ୍ତଦି ଦୟାଦାନ ପବିତ୍ରଆତ୍ମାଦି ମାଣ୍ଡୁକୁ ସାକା ଆତିମାନିଦେର; ମିରୁ ଝିଜିଦେର ସତ୍ ଇନିକା ନେସ୍ତିମାନିଦେର ।

୨୧ ମିରୁ ସତ୍ ନେସ୍ତିମାନିକା ନାନ ଜେ ମି ଲାକ୍ତୁ ରାସ୍‌ସିନା, ଆକା ସିଲେ; ମାତର ମିରୁ ସତ୍ ନେସ୍ତିମାନିକା ମାରି ଆମା ମିର୍ ମାଟା ସତ୍‌ତାନ ସଏଡ୍ ଇଜି ନେସ୍ତିମାନିକା ନାନୁ ମି ଲାକ୍ତୁ ରାସ୍‌ସିନା ।

୨୨ ଆରତିକ୍ ମିର୍‌ଝେରନିକାନ ଏନ୍ ? ଜିସୁକ୍ ରକ୍‌ୟାକର୍ତ୍ତା କ୍ରିସ୍ତ ଇଜି ଏନ୍ ମାନାଏନ୍, ମାରି ଝାନ କ୍ରିସ୍ତଦି ସାତୁ ବୁବା ମାରି ଝାନି ମାରିନତିକ୍, ରିଏରିକ୍‌ବା ଝାନ ଡିସ୍‌ନାନ ।

୨୩ ଏନ୍ ମାରିସିକ୍ ଡିସ୍‌ନାନ, ଝାନ ବୁବେକ୍ ବା ଡିସ୍‌ନାନ; ଏନ୍ ମାରିସିକ୍ ମାନାନାନ, ଝାନ ବୁବେକ୍ ବା ମାନାତା ମାନାନ ।

୨୪ ମାରି, ମିରୁ ଆରାମ୍‌ତାନ ଆମା କାବୁର୍ ଝେରକ୍‌ମାନିଦେର, ଆକା ମିମାନୁ ତେବାପିଡ୍ । ମିରୁ ଆରାମ୍‌ତାନ ଆମା କାବୁର୍ ଝେରକ୍‌ମାନିଦେର, ଆକା ଜଦି ମିମାନୁ ତେବାନାଡ୍, ଆରତିକ୍ ମିରୁ ବା ମାରିନ ନି ବୁବାଦିମାନୁ ତେବାନି ।

୨୫ ମାରି କ୍ରିସ୍ତ ମାଙ୍ଗ୍ ଆମାକା ପାର୍‌ମାଣ୍ କିତାମାନାନ, ଆକାନେ ଏସ୍‌କାଙ୍ଗ୍‌ଝିଜିଜି ଜିବନ୍ ।

୨୬ ଆମାକାର ମିଙ୍ଗ୍ ତିଲିସ୍ କିଦେକ୍ ସେସ୍ଟା କିଜିନାର୍, ଝାରି ବିସ୍‌ୟତାନ ନାନୁ ମି ଲାକ୍ତୁ ଇୟାଝିଜୁ ରାସ୍‌ସିନା ।

୨୭ ମାତର ମିଙ୍ଗ୍ କ୍ରିସ୍ତ ଜିସୁ ଝାନି ପବିତ୍ରଆତ୍ମା ପୁରାବର୍ତ୍ତ ଇଡ୍‌ତାମାନାନ, ଆମା ସାନ୍ଦି ଇୟା ପବିତ୍ରଆତ୍ମା ମିମାନୁ ମାନାଡ୍, ମାରି ଏନ୍‌ଆପିନ୍ ମିଙ୍ଗ୍ ସିକ୍‌ୟା ସିନାନ, ଇକା ମିଙ୍ଗ୍ ଦରକାର୍ ସିଲେଡ୍ । ପବିତ୍ରଆତ୍ମା ମିଙ୍ଗ୍ ଝିଜୁ ବିସ୍‌ୟତାନ ଆମା ସିକ୍‌ୟା ସିନାଡ୍, ଆକା ସତ୍, ମିର୍ ସିଲେ । ଆୟା ଆତ୍ମାଦି ସିକ୍‌ୟା ମାନାଜି କ୍ରିସ୍ତଦି ଝାଲେ ମିସାଜି ତେବାଦୁ ।

୨୮ ମାରି, ଏ କଡ୍‌ର, ଝାନିମାନୁ ତେବାଦୁ, ଏଣ୍ଡେସ୍ ଝାନ ଏସ୍ତିଝାଲେ ତରାନାନ, ନାସ୍ତିଝାଲେ ଝାନି ଝାନିଦିନତି ବେଡାଦୁ ଝାନ ଆଗ୍‌ଡି ମାଡୁ ସେମାର୍ ଆଏଣ୍‌ଗା ସାହାସ୍ ପୟନିକା ।

୨୯ ମାଡୁ ନେସ୍‌ନିଦେର, କ୍ରିସ୍ତ ପୁରା ନ୍ୟାୟକିନିକାନ । ମାରି ଇକାବା ନେସ୍‌ନି ମାନିକା ମାନାଡ୍ ଜେ, ଆମାକାର ସତ୍‌ପାଣି କିନାର୍, ଝାର୍ ନେ ମାପୁରୁଦି କଡ୍ ।

୩

ମାପୁରୁଦି କଡ଼ର୍

୧ ✧ ସୁତରା, ବୁବା ମାଙ୍ଗୁ ଏସା ଜିବନ୍‌ନୋନାନ୍, ମା ଉଣ୍ଡିଙ୍ଗ୍ ଖାନି ଜିବନ୍‌ନୋନିକା ନିସା ନାଣ୍ଡ ଜେ, ମାତୁ ମାପୁରୁଦି ଖାଜା ଦରଆତି ମାନିକା । ସତ୍‌ତାନ୍ ମାତୁ ଖାନି କଡ଼ର୍ ଆୟାଉଣ୍ଡିଙ୍ଗ୍ ଜଗଡ଼ ମାପୁରୁଦି ନେସ୍‌ଇତିମାନିଙ୍ଗ୍, ମାଙ୍ଗୁ ବା ସିନେ କିଦେଙ୍ଗ୍ ଆଟ୍‌ଏଡ଼ ।

୨ ଏ ନା ତଡ଼କୁ, ଇଲେଇ ମାତୁ ମାପୁରୁଦି କଡ଼ର୍, ମାତର୍ ଖାଜିନିକାଡ଼ାଦୁ ମାତୁ ଇନିକା ଆନିକା, ଆକା ଇୟାସାନ୍ ଖେଙ୍ଗେଏଡ଼ । ନିସନେ ମାତୁ ମାତୁ ନେସ୍‌ନିକା ଜେ, କ୍ରିସ୍ତ ଏସ୍ତ୍ରିଖାଲେ ତରାୟ୍‌ଆନାନ୍, ନାସ୍ତ୍ରିଖାଲେ ମାତୁ ଖାନି ଖାଜା ଆନାଟ୍, ଇରିଙ୍ଗ୍ ଖାନ୍ ଏଣ୍ଡେସ୍, ମାତୁ ଆୟାଖାଜା ଖାନିଙ୍ଗ୍ ସୁଡ଼ନୁଟ୍ ।

୩ ମାରି ଆମାକାର୍ କ୍ରିସ୍ତଦିମାନୁ ଇୟା ଆସା ତିଆର୍ କିତାମାନାର୍, ଖାର୍ କ୍ରିସ୍ତଦି ଖାଜା ନିଜେଦିଙ୍ଗ୍ ପବିତ୍ର କିଜି ଇଡ଼ନାର୍ ।

୪ ଏନ୍‌ଆପିନ୍ ପାପ୍ କିନାନ୍, ଖାନ୍ ମାପୁରୁଦି ନିୟମ୍ ମାନାଏନ୍, ଇରିଙ୍ଗ୍ ପାପ୍‌ତି ଅରଡ଼ ଆଜିନାଟ୍ ମାଟାଦିଙ୍ଗ୍ ମାନାଈକା ।

୫ ✧ ମାରି ମିର୍ ନେସ୍‌ନିଦେର୍ ଜେ, କ୍ରିସ୍ତ ପାପ୍ ଅତେଙ୍ଗ୍ ଇଜି ଖାତା ମାର୍‌ହାନ୍, ମାରି ଖାନିମାନୁ ପାପ୍ ସିଲେଡ଼ ।

୬ ଏନ୍ କ୍ରିସ୍ତଦି ଖାଲେ ମିସାଜି ତେବାନାନ୍, ଖାନ୍ ପାପ୍ କିଏନ୍; ମାତର୍ ଏନ୍ ପାପ୍ କିନାନ୍, ଖାନ୍ କ୍ରିସ୍ତଙ୍ଗ୍ ଏସ୍‌କାଙ୍ଗ୍‌ବା ସୁଡ଼ଏନ୍, ଏସ୍‌କାଙ୍ଗ୍ ଖାନିଙ୍ଗ୍ ନେସ୍‌ଏନ୍ ।

୭ ଏ କଡ଼ର୍, ଏନ୍ ମିଙ୍ଗୁ ବାୟା କିମାକିନ୍; ଏନ୍ ସଡ଼ପାଣି କିନାନ୍, କ୍ରିସ୍ତ ଏଣ୍ଡେସ୍ ଦାର୍ମ୍‌ଦିକାନ୍, ଖାନ୍ ଆୟାଖାଜା ଦାର୍ମ୍‌ଦିକାନ୍ ।

୮ ଏନ୍ ପାପ୍ କିନାନ୍, ଖାନ୍ ସୟତାନ୍‌ତି ମାଣୁକୁ ଜନମ୍, ଇରିଙ୍ଗ୍ ସୟତାନ୍ ଜଗଡ଼ ତିଆରଆତି ଆଗ୍‌ଡିରାନ୍‌ନେ ପାପ୍ କିଜିଖାଜିନାଟ୍ । ଆୟା ସୟତାନ୍‌ତି ପାଣିଦିଙ୍ଗ୍ ଦ୍ଵଂସ କିନି ଉଣ୍ଡିଙ୍ଗ୍ ମାପୁରୁଦି ମାରିନ୍ ଖାତାନ୍ ।

୯ ଏନ୍ ମାପୁରୁଦିମାଣୁକୁ ଜନମ୍, ଖାନ୍ ପାପ୍ କିଏନ୍, ଇରିଙ୍ଗ୍ ମାପୁରୁଦି ଖିଡୁ ଖାନିମାନୁ ମାନାଟ୍, ମାରି ମାପୁରୁ ଖାନି ବୁବା, ଖାନ୍ ପାପ୍ କିଦେଙ୍ଗ୍ ଆଟ୍‌ଏନ୍ ।

୧୦ ଇବେନ୍ ଏନ୍ ମାପୁରୁଦି ମାରିନ୍ ମାରି ଏନ୍ ସୟତାନୁଦି ମାରିନ୍, ଇକା ତରାୟୁଆନାତ୍ : ଏନ୍ ସତ୍ପାଣି କିଏନ୍, ମାରି ନିଜେଦି ତଡ଼ାନତିଙ୍ଗ ଜିବନ୍ନୋଏନ୍, ଖାନ୍ ମାପୁରୁଦି ମାରିନ୍ ଆଏନ୍ ।

ଅରେନ୍ ଆଇଖାନିଙ୍ଗ ଜିବନ୍ନୋଦୁ

୧୧ ✧ ଅରେନ୍ ଆଇଖାନିଙ୍ଗ ଜିବନ୍ନୋନିକା ମାନାତ୍, ଇୟା ମାଟା ମିର୍ ପୁର୍ବେଦାନ୍ ଖେରଇମାନିଦେର୍ ।

୧୨ ପାପଆମାଦି ମାରିନ୍ ଜେ କୟିନ୍, ଖାନି ଖାଜା ଆମାଟ୍, ଖାନ୍ ନିଜେଦି ତଡ଼ାନତିଙ୍ଗ ସାୟାମାରଗାତାକ୍ତାନ୍ । ଖାନି ତଡ଼ାନତିଙ୍ଗ ଖାନ୍ ଏକ୍ସା ସାୟାମାରଗାତାକ୍ତାନ୍ ? ଖାନି ନିଜେଦି ପାଣି ପାପୁଡୁ ମାର୍ହାତ୍; ମାତର ଖାନି ତଡ଼ାନ ଖିଜୁଦିନ୍ ସତ୍ପାଣି କିଜିମାର୍ହାନ୍ ।

୧୩ ମାରି, ଏ ତଡ଼ାନକୁ ନି ତାଙ୍ଗିକ୍, ଇୟା ଜଗତ୍ତି ଲୋକୁ ମିଙ୍ଗ୍ ଜେ କାଡ଼ାନାର୍, ଇବେନ୍ କାବା ଆମାଟ୍ ।

୧୪ ✧ ମାପୁ ନେସ୍ନାପ୍ ଜେ, ଇଲେଇ ମାପୁ ସାନିତାନିଙ୍ଗ ଜିଣାଜି ଜିବନ୍ ପୟତା ମାନାପ୍, ଇରିଙ୍ଗ ମାପୁ ତଡ଼ାନକାଙ୍ଗ ଜିବନ୍ନୋଜିନାପ୍ । ଏନ୍ ଜିବନ୍ନୋଏନ୍, ଖାନ୍ ସାନି ଅଦିକାର୍ତାନ୍ ତେବାନାନ୍ ।

୧୫ ଏନ୍ ନିଜେଦି ତଡ଼ାନତିଙ୍ଗ କାଡ଼ାନାନ୍, ଖାନ୍ ଅରେନ୍ ନରକ୍ଦିକାନ୍; ମାରି ନରକ୍ଦୁ ଏସ୍କାଙ୍ଗ୍ଝିଜ୍ଜ ଜିବନ୍ ସିଲେଡ୍, ଇକା ମିରୁ ନେସ୍ନିଦେର୍ ।

୧୬ ଜିସୁ କ୍ରିସ୍ତ ମା ଉଣ୍ଡିଙ୍ଗ ନିଜେଦି ଜିବନ୍ ସିତି ମାଣ୍ଡୁକୁ ମାଡୁ ଜିବନ୍ନୋନି ସିକ୍ସା ପୟତାମାନାପ୍; ମାରି ତଡ଼ାନକା ଉଣ୍ଡିଙ୍ଗ ମା ଜିବନ୍ ବା ସିନିକା ମାନାତ୍ ।

୧୭ ଜଦି ଅରେନ୍ ଜଗତ୍ଦୁ ମାଜନ୍ ଲୋକୁ ତଡ଼ାନତି କାକୁତ୍ ସୁଡ଼ୁଜି ବା ଖାନି ଉଣ୍ଡିଙ୍ଗ ଦୟା କିଏନ୍, ଖାନିମାନ୍ ମାପୁରୁଦି ଜିବନ୍ନୋନିକା ମାନାତ୍ ଇଜି ଏଣ୍ଡେସ୍ ଖେରତେଙ୍ଗ୍ ଆଟ୍ନାନ୍ ?

୧୮ ଏ କଡ଼ର୍, ରାଦୁ, ମାଡୁ ବାକ୍ୟଦାନ୍ ନୋ ଖେତଲ୍ତାନ୍ ଜିବନ୍ନୋଏଣ୍ଗା, ପାଣିଦାନ୍ ମାରି ସତ୍ତାନ୍ ଜିବନ୍ନୋନିକା ।

୧୯ ଆରତିଙ୍ଗ ମାଡୁ ନେସ୍ତେଙ୍ଗ୍ ଆଟ୍ନିକା ଜେ, ସତ୍ତାନ୍ ମା ତେବାନିକା ମାରି ମାଡୁ ତିଲାଇ ମୋନ୍ତାନ୍ ମାପୁରୁଦି ଲାକ୍ତୁ ତେବାଦେଙ୍ଗ୍ ଆଟ୍ନିକା ।

^{୨୦} ଜଦି ଆମାଛନ୍ତି ବିସ୍ମୟତାନ୍ ମା ବୁଦି ମାଙ୍ଗୁ ଦୋସ୍ କିନାଡ଼, ମାଡୁ ମନେ ଇତିନିକା ମାନାଡ଼, ଇରିଙ୍ଗ ମାପୁରୁ ମା ବୁଦିଦାନ୍ ପେରିକାନ୍ ମାରି ଖାନ୍ ଖିଜୁ ମାଟା ନେସ୍ନାନ୍ ।

^{୨୧} ନା ତଡ଼କୁ, ମା ବୁଦି ଜଦି ମାଙ୍ଗୁ ଦୋସ୍ କିଏଡ଼, ଆର୍ଡିଙ୍ଗ ମାପୁରୁଦି ଲାକଡ଼ୁ ମା ସାହାସ୍ ମାନାଡ଼ ।

^{୨୨} ମାରି ଖାନିଙ୍ଗ ମାଡୁ ଇନି ଇନିକା ଲସ୍ନିକା, ଆୟାଞ୍ଜିକୁ ଖାନିମାଣୁକୁ ପୟନିକା, ଇରିଙ୍ଗ ମାଡୁ ଖାନି ମାଟା ମାନାନିକା, ମାରି ଖାନି କାଣ୍ଡାଙ୍ଗ ଆମାକା ନେଗିକା, ଆକା କିଜିନାପ୍ ।

^{୨୩} ☆ଖାନି ମାଟା ଇକା ଜେ, ମାଡୁ ଖାନି ମାରିନ୍ ଜିସୁ କ୍ରିସ୍ତଦି ଦରତାନ୍ ବିସ୍ବାସ୍ କିନିକା ମାରି କ୍ରିସ୍ତଦି ଆଦେସ୍ ଇସାବ୍ତାନ୍ ନିଜେନିଜେଦିଙ୍ଗ ଜିବନ୍ନୋଜିସାନିକା ।

^{୨୪} ଏନ୍ ମାପୁରୁଦି ମାଟା ମାନାନାନ୍, ଖାନ୍ ମାପୁରୁଦି ମାଟା ଏଡ଼ କିନାନ୍ : ମାପୁରୁ ଖାନିମାନ୍ ତେବାନାନ୍ ମାରି ଖାନ୍ ମାପୁରୁଦିମାନ୍ ତେବାନାନ୍, ମାରି ମାପୁରୁ ମାମାନ୍ ତେବାନାନ୍, ଇୟା ମାଟା ମାଙ୍ଗୁ ସିତିମାନି ଖାନି ଆମ୍ବୁଦି ସାହାଜ୍ୟଦାନ୍ ମାଡୁ ନେସ୍ତେଙ୍ଗ ଆର୍ସିନିକା ।

୪

ମାପୁରୁଦି ଆମ୍ବୁ ମାରି ଟକେକିନି ଆମ୍ବୁ

^୧ ଏ ନା ତଡ଼କୁ, ଖିଜୁ ଆମ୍ବୁଆଙ୍ଗୁ ବିସ୍ବାସ୍ କିମାଟ୍; ଖାନ୍ ପୟତିମାନି ଆମ୍ବୁ ମାପୁରୁଦିମାଣୁକୁ ଖାତିକା ନୋ ସିଲେ, ଆଗଡ଼ି ଖାରିଙ୍ଗ ପରିକା କିଜ ସୁଡ଼ୁ । ଇରିଙ୍ଗ ଜଗଡ଼ୁ ଗାଦିଲୋକ୍ ବଣ୍ଟ ବାବବାଦିର ସତାମାନାର ।

^୨ ଖାନ୍ ମାପୁରୁଦି ଆମ୍ବୁ ପୟତାମାନାର ନୋ ସିଲେ, ଆକା ନେସ୍ନି ଉପାୟ ଆଜିନାଡ଼ ଆମା ଲୋକଡ଼ିମାନ୍ ମାପୁରୁଦି ଆମ୍ବୁ ମାନାଡ଼, ଖାନ୍ ପେରି ଖେୟୁଦାନ୍ ମାନାନାନ୍ ଜେ, ଜିସୁ କ୍ରିସ୍ତ ଲୋକା ଖାଜା ଖାତା ମାର୍ହାନ୍ ।

^୩ ମାତର୍ ଏନ୍ ଜିସୁଙ୍ଗୁ ମାନାଏନ୍, ଖାନ୍ ଏସ୍କାଙ୍ଗବା ମାପୁରୁଦି ଆମ୍ବୁ ପୟଏନ୍ । କ୍ରିସ୍ତଦି ସାବୁଦି ମାଣୁକୁ ଖାନ୍

ଆୟା ଆମ୍ଭା ପୟତାମାନାନ୍, ଆମାଞ୍ଜାନି ଖାନିଦିନ୍ତି ମାଟା ମିରୁ ଖେରଇମାନିଦେର୍, ମାରି ଆକା ଇଲେଇ ଇୟା ଜଗତ୍ତୁ ଖାତାମାନାତ୍ ।

୪ ଏ କଡର୍, ମିରୁ ମାପୁରୁଦିମାଣୁକୁ ଜନମ୍, ମାରି ମିରୁ ଆୟା ବଣ୍ଟ ବାବବାଦିରିଙ୍ଗ୍ ଆରାକିତିମାନିଦେର୍, ଇରିଙ୍ଗ୍ ମି ଜିବନ୍ତୁ ବାସାତି ମାନି ମାପୁରୁଦି ଆମ୍ଭା, ଜଗତ୍ତୁ ଲୋକା ଆମ୍ଭାଆଙ୍ଗ୍ ମାଣୁକୁ ନାଣୁ ସାକ୍ତି ।

୫ ବଣ୍ଟ ବାବବାଦିର୍ ଜଗତ୍ତାନୁ ଖାତାମାନାର୍, ମାରି ବଣ୍ଟ ବାବବାଦିର୍ ଦୁନିଆଦି ମାଟା ଖେର୍ସି ବୁଲାଇନାର୍ ମାରି ଦୁନିଆଦି ଲୋକୁ ଖାରି ମାଟା ଖେନ୍ଝିନାର୍ ।

୬ ମାତର୍ ମାତୁ ମାପୁରୁଦିମାଣୁକୁ ଜନମ୍; ଏନ୍ ମାପୁରୁଦି ନେସ୍ନାନ, ଖାନ୍ ମା ମାଟା ଖେନାନ୍ । ଏନ୍ ମାପୁରୁଦିମାଣୁକୁ ଜନମ୍ ଆଏନ୍, ଖାନ୍ ମା ମାଟା ଖେନ୍ଏନ୍ । ଇୟାମାଣୁକୁ ମାତୁ ସତ୍ତି ଆମ୍ଭା ମାରି ବାୟାକିନି ଆମ୍ଭାଦିଙ୍ଗ୍ ସିନିସ୍ କିଦେଙ୍ଗ୍ ଆଟ୍ନିକା ।

ମାପୁରୁ ଜିବନ୍ନୋନିକା

୭ ଏ ନା ତଡ୍ଡକୁ, ମାତୁ ନିଜେନିଜେଦିଙ୍ଗ୍ ଜିବନ୍ନୋଜିସାନିକା, ଇରିଙ୍ଗ୍ ଜିବନ୍ନୋନିକା ମାପୁରୁଦିମାଣୁକୁ ଖାତାମାନାତ୍, ମାରି ଏନ୍ ଜିବନ୍ନୋନାନ, ଖାନ୍ ମାପୁରୁଦି ମାରିନ୍ ମାରି ଖାନ୍ ମାପୁରୁଙ୍ଗ୍ ନେସ୍ନାନ ।

୮ ଏନ୍ ଜିବନ୍ନୋଏନ୍, ଖାନ୍ ମାପୁରୁଙ୍ଗ୍ ନେସ୍ଏନ୍, ଇରିଙ୍ଗ୍ ମାପୁରୁନେ ଜିବନ୍ନୋନିକାନ୍ ।

୯ ଇବେନ୍ ମାପୁରୁଦି ଜିବନ୍ନୋନିକା ମା ଉଣ୍ଟିଙ୍ଗ୍ ତର୍ତାମାନାନ୍, ମାପୁରୁ ଜେ ନିଜେଦି ମାରିନ୍ତିଙ୍ଗ୍ ଜଗତ୍ତୁ ପୋକ୍ତାତାନ୍, ଏଣ୍ଟେସ୍ ମାପ୍ ଖାନିମାଣୁକୁ ଖିଜୁଦିନ୍ ଜିବନ୍ ପୟନାପ୍ ।

୧୦ ଇକାନେ ସତ୍ତି ଜିବନ୍ନୋନିକା, ମାତୁ ମାପୁରୁଙ୍ଗ୍ ଜିବନ୍ନୋଇକା, ମାତର୍ ଖାନ୍ ମାଙ୍ଗ୍ ଜିବନ୍ନୋଜି, ମାରି ନିଜେଦି ମାରିନ୍ତିଙ୍ଗ୍ ମା ପାପ୍ତିଙ୍ଗ୍ ପିଣ୍ଟିନି ଅନିଉଣ୍ଟିଙ୍ଗ୍ ପୋକ୍ତାତାନ୍ ।

୧୧ ଏ ନା ତଡ୍ଡକୁ, ମାପୁରୁ ଜଦି ମାଙ୍ଗ୍ ଇୟାଞ୍ଜା ଜିବନ୍ନୋତା ମାନାନ୍, ଆର୍ତିଙ୍ଗ୍ ମାତୁ ବା ନିଜେନିଜେଦିଙ୍ଗ୍ ଜିବନ୍ନୋଜିସାନିକା ମାନାତ୍ ।

୧୭ ☆ମାପୁରୁଙ୍କୁ ଏନ୍ ଏସକାଙ୍କ ସୁତୁନ୍, ମାତର୍ ମାତୁ ଜଦି ନିଜେନିଜେଦିଙ୍କ ଜିବନ୍ନୋଜିସାନିକା, ଆରତିଙ୍କ ମାପୁରୁ ମାମାନୁ ମାନାନ୍ ମାରି ଖାନି ଜିବନ୍ନୋନିକା ମାମାନୁ ପୁରାତେବାତା ମାନାତ୍ ।

୧୮ ମାତୁ ଜେ ମାପୁରୁଦିମାନୁ ମାନିକା ମାରି ଖାନ୍ ମାମାନୁ ମାନାନ୍, ଇକା ମାତୁ ନେସ୍ନିକା, ଇରିଙ୍କ ଖାନ୍ ମାଙ୍କୁ ନିଜେଦି ଆମ୍ବଦି ଖାଲେ ସିତାମାନାନ୍ ।

୧୯ ବୁବା ଜେ ମାରିସିଙ୍କ ଜଗତଦି ରକିୟାକର୍ତ୍ତା ଆନି ଉଣ୍ଡିଙ୍କ ପୋକ୍ତାତା ମାନାନ୍, ଇକା ମାତୁ ସୁତୁଡି ମାନିକା ମାରି ଖାନି ବିସୟତାନ୍ ଆଇଝାରିଙ୍କ ସାକିୟ୍ ଖେରସିନିକା ।

୨୦ ଏନ୍ ଜିସୁଙ୍କୁ ମାପୁରୁଦି ମାରିନ୍ ଇଜି ମାନାନାନ୍, ମାପୁରୁ ଖାନିମାନୁ ମାନାନ୍ ମାରି ଖାନ୍ ମାପୁରୁଦିମାନୁ ମାନାନ୍ ।

୨୧ ମାରି ମା ଉଣ୍ଡିଙ୍କ ମାପୁରୁଦି ଆମା ଜିବନ୍ନୋନିକା ମାନାତ୍, ଆକା ମାତୁ ନେସ୍ତି ମାନିକା ମାରି ବିସ୍ବାସ୍ କିତାମାନାପ୍ । ମାପୁରୁନେ ଜିବନ୍ନୋନିକାନ୍ । ଆମାଖାନି ଜିବନ୍ତୁ ଜିବନ୍ନୋନିକା ପୁରା ତେବାତା ମାନାତ୍, ଖାନ୍ ମାପୁରୁଦିମାନୁ ତେବାନାନ୍ ମାରି ମାପୁରୁ ଖାନିମାନୁ ତେବାନାନ୍ ।

୨୨ ଇବେନ୍ନୁ ଜିବନ୍ନୋନିକା ମାମାନୁ ପୁରାତେବାତା ମାନାତ୍ ଜେ, ବିଚାରତି ନାଣ୍ଡିଙ୍କ ମାତୁ ସାହାସ୍ ପୟନିକା, ଇରିଙ୍କ କ୍ରିସ୍ ଏଣ୍ଡେସ୍ ମାନାନ୍, ମାତୁ ବା ଇୟା ଜଗତୁ ଆୟାଝାଜା ମାନିକା ।

୨୩ ଏମେମାନୁ ଜିବନ୍ନୋନିକା ମାନାତ୍, ଆବେନ୍ନୁ ତିଲାନିକା ସିଲେଡ୍, ମାତର୍ ସତ୍ତି ଜିବନ୍ନୋନିକା ତିଲାନି ତାନିଙ୍କ ଆକ କିନାତ୍, ଇରିଙ୍କ ତିଲାନିକା ଦଣ୍ଡୁତି ଖାଲେ ସିମାନାତ୍, ମାରି ଏନ୍ ତିଲାନାନ୍, ଖାନିମାନୁ ଜିବନ୍ନୋନିକା ପୁରା ସିଲେଡ୍ ।

୨୪ ମାତୁ ଜିବନ୍ନୋନିକା ଅଜାତାମାନାପ୍, ଇରିଙ୍କ ମାପୁରୁ ନେ ଆଗଡି ମାଙ୍କୁ ଜିବନ୍ନୋତା ମାନାନ୍ ।

୨୫ ମାପୁରୁଙ୍କୁ ଜିବନ୍ନୋଜିନା ଇଜି ଖେରସି ଜଦି ଏନ୍ ନିଜେଦି ବିସ୍ବାସିରି ତଡାନ୍ତିଙ୍କ ନି ତାଙ୍କୁ କାଡାନାନ୍, ଆରତିଙ୍କ ଖାନ୍ ମିଡ୍‌ଖେରନିକାନ୍ । ଲାକ୍ତୁ ସୁତୁଡିମାନି ଅରେନ୍ ତଡାନ୍ତିଙ୍କ ଏନ୍

ଜିବନ୍ନୋଦେଈ ଆଟ୍ଟନ୍, ଖାନ୍ ତରଈ ମାପୁରୁକୁ ଏସକାଙ୍ଗବା
ଜିବନ୍ନୋଦେଈ ଆଟ୍ଟନ୍ ।

^{୨୧} ଇୟା ଆଦେସ୍ କ୍ରିସ୍ ମାଙ୍ଗ୍ ସିତାମାନାନ୍, ଏନ୍ ମାପୁରୁକୁ
ଜିବନ୍ନୋନାନ୍, ଖାନ୍ ନିଜେଦି ତଡ଼ାନ୍ତିଙ୍ଗ୍ ବା ଜିବନ୍ନୋପିନ୍ ।



ଦୁନିଆଦି ମୁସକୁ ଜିଣାନିକା

^୧ ଏନ୍ ଜିସୁକୁ ମସିହ ଇଜି ବିସବାସ୍ କିନାନ୍, ଖାନ୍ ମାପୁରୁଦି
ମାରିନ୍; ମାରି, ଏନ୍ଆପିନ୍ ଅରେନ୍ ବୁବେଙ୍ଗ୍ ଜିବନ୍ନୋନାନ୍, ଆୟା
ବୁବାସିଦି କଡ଼ଦିଙ୍ଗ୍ ବା ଖାନ୍ ଜିବନ୍ନୋନାନ୍ ।

^୨ ମାତୁ ଏସ୍ତିଖାଲେ ମାପୁରୁକୁ ଜିବନ୍ନୋନିକା ମାରି ଖାନ୍ ମାଟା
ମାନାମାପ୍, ନାସ୍ତିଖାଲେ ନେସ୍ତେଙ୍ଗ୍ ଆଟ୍ଟନାପ୍ ଜେ, ମାତୁ ମାପୁରୁଦି
କଡ଼ରିଙ୍ଗ୍ ଜିବନ୍ନୋଜିନାପ୍ ।

^୩ ☆ ଇରିଙ୍ଗ୍ ମାପୁରୁକୁ ଜିବନ୍ନୋନି ଅର୍ଥ ଆଜିନାଡ଼, ମାତୁ ଖାନ୍
ମାଟା ମାନାନିକା, ମାରି ଖାନ୍ ମାଟା ମାନାନିକା ନାଣ୍ଡ କାସ୍ତୁସିଲେ ।

^୪ ଇରିଙ୍ଗ୍ ମାପୁରୁଦି କଡ଼ର ଇୟା ଜଗଡ଼ତିଙ୍ଗ୍ ଆରା କିଦେଙ୍ଗ୍
ସାକ୍ତି ପୟତାମାନାନ୍ । ବିସବାସ୍ତି ସାକ୍ତିଦାନ୍ ମାତୁ ଜଗଡ଼ତି ମୁସକୁ
ଜିଣାଦେଙ୍ଗ୍ ଆଟ୍ଟନିକା ।

^୫ ଇୟା ଜଗଡ଼ତିଙ୍ଗ୍ ଏନ୍ ଆରା କିଦେଙ୍ଗ୍ ଆଟ୍ଟନାନ୍ ? ଜିସୁକୁ
ମାପୁରୁଦି ମାରିନ୍ ଇଜି ଏନ୍ ବିସବାସ୍ କିନାନ୍, ଆୟାକାନ୍ନେ କେବଲ୍
ଇକା କିଦେଙ୍ଗ୍ ଆଟ୍ଟନାନ୍ ।

ଜିସୁ କ୍ରିସ୍ତିଦି ବିସୟତାନ୍ ସାକ୍ତି

^୬ ଆୟା ଜିସୁ କ୍ରିସ୍ ମାପୁରୁଦି ମାରିନ୍ ଇଜି ଦୁବନ୍ତାନ୍ ଖାନ୍ ଜିବନ୍ତି
ପାଣି ଆରାମ୍ କିତାମାହାନ୍, ମାରି ନିଜେଦି ନେତେରତାନ୍ ଲୋକା
ରକ୍ଷାକିନି ପାଣିକିତାନ୍ । କେବଲ୍ ଦୁବନ୍ ଅସି ଖାନ୍ ରେଏନ୍ ମାହାନ୍,
ମାତର ଏରୁ ନି ନେତେର ରୁଣ୍ଡିଖାନିକାଙ୍ଗ୍ ସିଜି ଖାତାମାହାନ୍ । ମାରି
ଆମ୍ ବା ଇବେଣି ସାକ୍ତି ଖେରନାନ୍; ଇରିଙ୍ଗ୍ ଆମ୍ ନେ ସଡ଼ ।

^୭ ମାରି ଇୟା ମୁଏରି ସାକ୍ତି ଉନ୍ତେ ସାମାନ୍,

୮ ଆମ୍ଭ, ଏବଂ ମାରି ନେତେର, ଇୟା ମୁଏର ସାକି ଖେରନାର ।

୯ ମାତ୍ର ଜଦି ଲୋକା ସାକି ମାନାନିକା, ଆରତିଙ୍ଗ ମାପୁରୁଦି ସାକି ଆୟାମାଣୁକୁ ନାଣୁ ପେରିକା, ମାରି ମାପୁରୁଦି ସାକି ଇକା ଜେ, ଝାନ୍ ନିଜେଦି ମାରିନ୍ତି ବିସୟତାନ୍ ସାକି ସିତାମାନାନ୍ ।

୧୦ ଏନ୍ ମାପୁରୁଦି ମାରିନ୍ତିମାନୁ ବିସବାସ କିନାନ୍, ଝାନ୍ ନିଜେଦି ଜିବନ୍ତୁ ଇୟା ସାକି ପୟତା ମାନାନ୍; ଏନ୍ ମାପୁରୁଦି ସାକି ବିସବାସ କିଏନ୍, ଝାନ୍ ମାପୁରୁଦି ମିତ୍‌ଖେରନିକାନ୍ କିତାମାନାନ୍, ଇରିଙ୍ଗ ମାପୁରୁ ନିଜେଦି ମାରିନ୍ତି ବିସୟତାନ୍ ଆମା ସାକି ଖେରତାମାନାନ୍, ଆବେନ୍ ଝାନ୍ ବିସବାସ କିଏନ୍ ।

୧୧ ଆୟା ସାକିଦି ଅରଡ଼ ଆତାଡ଼ଜେ, ମାପୁରୁ ମାଙ୍ଗ୍ ଏସକାଙ୍ଗ୍‌ଝିଜ୍‌ଜ ଜିବନ୍ ସିତାମାନାନ୍; ମାରି ଆୟା ଜିବନ୍ ଝାନ୍ ମାରିନ୍ତିମାନୁ ମାନାଡ଼ ।

୧୨ ଏନ୍ ମାରିନ୍ତିଙ୍ଗ ପୟତା ମାନାନ୍, ଝାନ୍ ଜିବନ୍ ପୟତା ମାନାନ୍; ଏନ୍ ମାପୁରୁଦି ମାରିନ୍ତିଙ୍ଗ ପୟଏନ୍, ଝାନ୍ ଜିବନ୍ ବା ପୟଏନ୍ ।

ଏସକାଙ୍ଗ୍‌ଝିଜ୍‌ଜ ଜିବନ୍

୧୩ ମାପୁରୁଦି ମାରିନ୍ତି ଦର୍ତ୍ତାନ୍ ବିସବାସ କିଜିନିଦେର୍ ଜେ ମିରୁ, ମିରୁ ଏଣ୍ଡେସ ନେସ୍‌ନିଦେର୍ ଜେ, ମିରୁ ଏସକାଙ୍ଗ୍‌ଝିଜ୍‌ଜ ଜିବନ୍ ପୟତିମାନିଦେର୍, ଇୟାଉଣ୍ଡିଙ୍ଗ ନାନୁ ମିଙ୍ଗ୍ ଇୟା ଆକୁ ରାସ୍‌ସିନା ।

୧୪ ମାପୁ ତିଲାଏଣ୍‌ଗା ମାପୁରୁଦି ଲାକ୍‌ତୁ ଝାଦେଙ୍ଗ୍ ଆର୍‌ସିନାପ୍, ଇରିଙ୍ଗ ମାପୁ ସଡ଼ତାନ୍ ନେସ୍‌ନାପ୍ ଜେ, ମାପୁ ଏସକାଙ୍ଗ୍ ଝାନ୍ ଇଚ୍ଛାଦାନ୍ ଇନି ପାର୍‌ତାନା କିତିଙ୍ଗ୍, ଆରତିଙ୍ଗ୍ ଝାନ୍ ମା ଆୟା ପାର୍‌ତାନା ଝେନାନ୍ ।

୧୫ ମାରି ମାତ୍ର ଝାନ୍ ଲାକ୍‌ତୁ ଆମାକା ଇନିକା ପାର୍‌ତାନା କିନିକା, ଆକା ଝାନ୍ ଝେନାନ୍ ଇଜି ଜଦି ମାତ୍ର ନେସ୍‌ନିକା, ଆରତିଙ୍ଗ୍ ଝାନ୍ ଲାକ୍‌ତୁ ଆମାକା ପାର୍‌ତାନା କିତିମାନିକା, ଆୟାଝିଜ୍‌ଜେ ପୟତିମାନିକା, ଇକାବା ନେସ୍‌ନାପ୍ ।

୧୬ ଜଦି ମି ଅରେନ୍ ତଡ଼ାନ୍ ପାପ୍ କିଜିମାନିକା ସୁଡ଼ତୁଙ୍ଗ୍, ମାରି ଆୟା ପାପ୍ ସାନିନାନିକା ଆଏଡ଼ ମାନାଡ଼, ଝାନ୍ ଉଣ୍ଡିଙ୍ଗ୍ ମାପୁରୁଦି ପାର୍‌ତାନା କିଦୁ, ଏଣ୍ଡେସାତିଙ୍ଗ୍ ମାପୁରୁ ଝାନ୍‌ଙ୍ଗ୍ କେମା ସିଜି ରକ୍‌ୟା

କିନାନ୍ । ମାରି ମାପୁରୁ ଏଣେସ୍‌ଝାଜା ସାନିକା ପାପ୍ କିଇ ମାନି
ଲୋକାଙ୍ଗ୍ ଜିବନ୍ ଦାନ୍ ସିନାନ୍, ଆୟାଝାଜା ଝାନିଙ୍ଗ୍ ବା ଜିବନ୍ ଦାନ୍
ସିନାନ୍ । ସାନିନାନି ପାପ୍ ମାନାଡ଼; ଆୟାଝାଜା ଝାନ୍ ପାର୍ତାନା
କିପିନ୍ ଇଜି ନାନୁ ଇନ୍‌ଏ ।

୧୭ ଝିଜୁ ତାଗିଇ ପାଣି ପାପ୍, ମାତର୍ ଆମାକା ସାନିନାନିକା ସିଲେଡ଼,
ଇୟାଝାଜା ପାପ୍ ମାନାଡ଼ ।

୧୮ ମାପୁ ନେସ୍‌ନାପ୍, ମାପୁରୁଦି ମାରିନ୍ ପାପୁଡୁ ମିସାଜ ତେବାଏନ୍;
ଇରିଙ୍ଗ୍ ମାପୁରୁଦି ମାରିନ୍ ଝାନିଙ୍ଗ୍ ରକ୍‌ୟା କିନାନ୍, ମାରି ସୟତାନ୍
ଝାନିଙ୍ଗ୍ ଇନିକା କିଦେଙ୍ଗ୍ ଆଟ୍‌ଏଡ଼ ।

୧୯ ମାଡୁ ଜେ ମାପୁରୁଦିମାଣୁକୁ ଜନମ୍ ମାରି ଝିଜୁ ଜଗଡ଼ ଜେ
ସୟତାନ୍‌ତି ଅଦିକାର୍, ଇକା ମାପୁ ନେସ୍‌ନାପ୍ ।

୨୦ ମାରି ବା ମାପୁ ନେସ୍‌ନାପ୍ ଜେ, ମାପୁରୁଦି ମାରିନ୍ ଝାତାମାନାନ୍
ମାରି ସଡ଼ତିଙ୍ଗ୍ ନେସ୍‌ନି ଉଣ୍ଡିଙ୍ଗ୍ ମାଙ୍ଗ୍ ବୁଦି ସିତାମାନାନ୍; ମାରି ମାଡୁ
ଆୟା ସଡ଼ତି ମାପୁରୁଦିମାନୁ ମାରି ଝାନି ମାରିନ୍ ଜିସୁ କ୍ରିସ୍ତୁଦି ଝାଲେ
ମାନାଡ଼ । ଝାନ୍ ନେ ସଡ଼ତି ମାପୁରୁ ମାରି ଏସକାଙ୍ଗ୍‌ଝିଜୁଇ ଜିବନ୍ ।

୨୧ ଏ କଡ଼ର୍, ସଡ଼ସିଲି ଦିୟାମ୍‌କାମାଣୁକୁ ନିଜେ ନିଜେଦିଙ୍ଗ୍
ଆକତେବାଡୁ ।

ମାପୁରୁଦି ସବ୍ ବାକ୍ୟ

The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)

copyright © 2020 The Word for the World International and Konda Porja Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

ମାପୁରୁଦି ସବ୍ ବାକ୍ୟ

ପୁନି ନିୟମ, 2020

The New Testament in Konda Porja Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

506ae627-08e2-556a-b39e-5315f886d95a